

Miercus 6
S. Nicolau vescul

Sabide 9
S. Sîr

Martars 12
La Madone di Guadalupe

Lis voris dal mês
Se il teren nol ves di jessi dal dut glaçât, o podês svangjâ e butâ ledan



Il soreli
Ai 10 al jeve aes 7.24 e al va a mont aes 16.30

Joibe 7
S. Ambrôs

Domenie 10
La Madone di Laurêt

Il timp
Frêt e nêf ancje in planure

Il proverbi
La prime nobiltât e je chê des azions



La lune
Ai 10 ultin cuart

Vinars 8
Imaculade concezion

Lunis 11
S. Damàs

lis GNOVIS

SCUELE Il Puart des maraveis

Di chê strade de fieste di Sant Andree, li dal municipi di Puart e je stade presentade la vuide «Mirabilia. Portogruaro delle meraviglie». Il progjet al è stât programât de Scuele «Marco Polo» e al è stât fat in grazie dal jutori de Fondazione di Comunitât «Santo Stefano», che lu à sielzût fra altris 14. Il libri nol è dome une vuide gnove, ma al è ancje un progjet gnûf parcè che la vile furlane sot Vignesie e je stade cjalade cui vôi gnûfs dai fruts. Il percors turistic al propon zûcs, ativitâts, profundiments storicis e turisticis orijinâi ideâts dai scuelârs cul jutori dai insegnants, che a àn seguît la metodologie de Progjetazion universâl dai aprediments (<http://fondazioneantostefano.it/una-nuova-guida-dedicata-a-portogruaro-a-cura-dei-bambini-mirabilia/>). La rêt educative dal mandament di Glemona «B*sogno d'esserçi» (www.bsognodesserci.it) e invie une altre schirie di ativitâts par burî fûr «Giovani Talenti». Joibe ai 7 di Dicembar, la zoventût e podarà confrontâsi cun «Storie di scelte riuscite», a 20.30 li dal teatri «La Corte» di Osôf. Par animâ la serade a son stâts invidâts esperts di politicis educativis e di relazion internazionâls, musiciscj, miedis, balarins, Dj e curadôrs di art. Cul jutori dal Comun di Trasaghis e de clape «Media Educazione Comunità» a saran proponudis altris dôs convignis sul stes stamp.

ALPS JULIIS E CÛJARGNELIS Lis monts dal cidinôr



L'alpinist di Mueç, Mario Di Gallo, vuide alpine dal 1986 e curadôr de vuide «Cai» da lis Alps cÛjargnelis cun Attilio De Rovere, lunis ai 11 di Dicembar, al interven a Triest su «Alpi Giulie e Carniche: montagne del silenzio». La sô relazion e jentre te serade, immaneade des sezions «Cai» di Triest, dal Slovensko planinsko društvo Trst e de clape «Monte Analo» par celebrâ la «Zornade internazionâl de montagne». Li dal teatri «Miela» di Triest, a 21, si presentarà ancje il film «Domandando di Dougan» di Giorgio Gregorio e di Flavio Ghio, che al conte la storie dal alpinist triestin dal Votcent Vladimiro Dougan (te foto, il prin a man çampe), che si è rimpinât su lis Alps occidentâls, su lis pichis caucasichis e dal Atlant, ma cence mai bandonâ i crets des Alps Juliis.

Ûs public de Lenghe Furlane: doi dîs di confront

Cence plans, si va planc



Tal auditorium de Region a Udin e tal Salon dal Parlament dal Friûl a son stâts doi dîs di dibatit sui risultâts de politicis linguistiche metude in vore tal cuincueni pene finit. Tes voris de Seconde conference regionâl di verifiche e di propueste su la atuazion de leç regionâl 29/2007, un moment di confront previodût de leç stesse, si son cjatâts passe 300 fra tecnics, ricercjadôrs, politicis, insegnants e no dome, cun chê di puartâ in lûs dutis lis problematichis che a integnin lis azions pe tutele de lenghe furlane in diviers cjamps. Cuatri grups di lavôr (Planificazion Linguistiche, Istruzion, Amministrazion Pubbliche e Media) a àn relazionât su cetantis criticitâts gnovis e antighis a dîs agns de introduzion de norme regionâl che e varès di prudelâ e slargjâ l'ûs dal furlan te vite publiche.

In chescj cjamps Stât, Region, Universitât, scuele, media e associazions a varessin di lavorâ ogni di par rindi la marilenghe... une lenghe «normâl», magari cussî no vuê la situazion no je cheste. Inte Union Europeane a son 40 milions i citadins che a fevelin une lenghe di minorance, pôc mancul de popolazion de Spagne, par chest la misure e je stade fate cjalant ancje ce che al sucêt a cjase di chei altris, in graciis dai esemplis puartâts

dai rapresentants di istituzions politicis e scientificis di minorance Frisone (Pais Bas), Galiziane (Spagne), e Galese (Ream Unît). Lis sumis pal furlan a son stadis tiradis cun relazionis une vore ben fatis, a disposizion di duçj sui sîts de Region e de AR-LeF; là che dut cûs al ven fûr che la situazion e je avonde grivie.

I imprescj tecnics, scientificis e informatics no mancjn, e i investiments tai ultins agns a son cressûts, duncje dulâ vano cirudis lis responsabilitâts? Lis motivazions storichis de minorazion si cognossin, ma parcè si stentie a cambiâ? Di là dai discors a pôcs mês de elezions, in Italie e chi di nô pe politicis che il plurilinguism nol è vivût tant che un valôr e cheste e je

une mancjance che si riflet su la scuele e tai media, là che dut cûs la domande di contignûts e je fuarte, straçant competencis che a esistin. La leç 29, tai siei prins agns di vite, e à subito cetantis formis di ralentament, e chel che al è stât fat da râr al è viodût tant che la realizazion di un dirit fundamentâl dal om, chel de lenghe, ma come une ecezion. L'imprest dal Plan gjerâr di politicis linguistiche al è rivât tart e in di di vuê no si à ancjemò viodût nancje un Plan linguistic comunâl. Te scuele l'ûs veicolâr al è stât frenât e la liste dai insegnants competents e jere un «dentro tutti». Cence plans, si va a planc. Ancjemò si stente a inviâ une programazion in marilenghe su la RAI, la

politicis no feveli mai par furlan e si à simpri di domandâ il permès par fâ alc intune lenghe che no sedi chê «nazionâl». Po dopo, si viôt che a ogni passaç di competencis nol capite mai nuie di automatic par mantignî i risultâts che a son stâts fats su la lenghe furlane. Te nestre region, là che la diversitât e je la fonde de autonomie, la grande part de popolazion no je cussiente dai siei dirits, garantîts su la cjarte, e di ogjet des politicis di minorazion tantis voltis e devente sogjet atif, convinte di insiorâsi butant vie une identitât milenarie. La sperance e je che i risultâts di cheste convignie, fate a daspò di chê relative ae lenghe slovene e a pôcs dis de aprovazion dal passaç dal comun gjermanofon di Sapade al Friûl-Vignesie Julie, a deven-tin spont di riflession soredut pe politicis, e che la prossime edizion no vegni tignude dongje de fin de legislature. In tancj lu san, ma sal dismentein: valorizâ, fevelâ e insegnâ furlan, sloven e todesc al significhe vierzisi, no sierâsi. Al è ancje la miôr maniere par prudelâ la nestre specialitât e par jessi ad implen citadins europeans.

IL CORO POLIFONICO DI RUDA organizza delle AUDIZIONI PER TENORI E BASSI

da inserire in organico. Chi fosse interessato è pregato di telefonare allo **0431.998621** (ore ufficio) o al **335.1360931** o al **345.2833963**.

Le audizioni si terranno a Ruda, nella sede del coro, in via Mosettig 1, con orari che saranno comunicati direttamente agli interessati. Ogni candidato – di età compresa tra i 18 e i 40 anni – può presentarsi all'audizione con un brano di libera scelta (facoltativo). La direzione comunicherà poi gli esiti direttamente ad ogni aspirante corista.



Per maggiori info: www.ilpolifonico.it

SOCIETÂT FILOLOGJICHE FURLANE

Ve' ca il Strolc furlan

A l'è stât presentât, come par tradizion a Sante Catarine, il Strolc furlan pal 2018 de Societât Filologjiche Furlane che, aromai dongje dal centenari dal Sodalizi, al è rivât a la edizion numar 99.

Il curadôr e strolegant, Dani Pagnucco, al à metût adun cheste gnove edizion dal Strolc su la fonde dal teme de «pôre» – nol è un cûs che a compagnâ i letôrs a sedin lis avventuris di Gigi «Sbigula»! – un argoment che nol è facil di tratâ cun ligrie e snait, ma che i autôrs a àn savût frontâ fasint plui che ben. A son fintremai sessante i colaboradôrs che a àn scrit contis, poesîis, rubrichis, in dutis lis varietâts de lenghe furlane, di soreli a mont a soreli jevât e de mont al mâr, cÛjapant dentri ancje il dialet bisiac e lis fevelis todescis di Sapade, Sauris e Tamau.

Ogni mês a scrivin par nô Renzo Peressini (furlan di Spilimberc), Antonino Danelutto (furlan di Sclose), Gianni Colledani (furlan di Clausiet) e tancj altris. Gianfranco Ellero, doprant ancje bielis fotografiis di epoche, al conte la storie de

Udinese, des originis ae fin dal Votcent aes partidis dai agns Cincuante tal stadio Moretti, fin ai zuiadôrs – Zico in primis – che a àn fate la storie de nestre scuadre di balon fasintle diventâ un vêr simbul dal Friûl. O cÛjatn ancje il non di Stefano Montello, che nus compagne intune riflession speciâl partint des jerbatis plui comunis tai nestrîs cjamps e orts, tant che grame, vididule, sorghete, code di cjavâl. M

a la vôs principâl dal Strolc 2018 e je chê dai arlêfs dai cors praticis di lenghe e culture furlane da la Filologjiche – in 500 di lôr chest an a àn frecuentât i cors in dutis lis bandis dal Friûl! – che a àn volût metisi in zûc cul scrivi par furlan.

La cuvierline e i quadris che a vierzin i dodis mês dal an – scuasi duçj ineditis – a son di Lionello Fioretti, artist mancjât tal 2004; i disens che a compagnin lis contis a son di Annalisa Gasparotto. In cuarte di cuvierline une fotografie di Elio Ciol, fate intant che si zirave il film «Gli ultimi» di pari David Maria Turoldo. Il Strolc al è compagnât dal Lunari da la Filologjiche pal 2018, publicât cu la poie



da la Bancje Popolâr di Cividât, che pal tierç an di file al presente antighis cartulinis dal Friûl gjavadis dal font da la Societât. Mês par mês si pues cussî fâ un viaç ideâl tal Friûl di une volte passant par Udin, Pordenon e Gurize e rivant a Tumieç, Cividât, Manzan, Mortean, Tisane, Gardisce dal Lusinç a soreli jevât, Prate di Pordenon, Purcie e Maniâ a soreli a mont.

Il Strolc e il Lunari, dopo jessi stâts presentâts a Udin, a saran presentâts a Cluziet ai 7 di Dicembar, a Monfalcon ai 8, a Volleson Darzin ai 9, a Sopula ai 13.